

Jangan terlalu gantung pada kerajaan, nasihat Musa Hitam
SinarHarian
12 Mac 2013
Oleh Salmiah Druhamad Drahsin

SHAH ALAM - Menafikan pendapat mengatakan ekonomi Melayu dalam keadaan serius di kala ini, bekas Timbalan Perdana Menteri, Tun Musa Hitam menekankan orang Melayu mesti ada semangat juang tinggi dan tidak terlalu bergantung kepada kerajaan.

"Masanya sudah tiba orang Melayu janganlah meneruskan sikap terlampau merendah diri hinggakan kita boleh anggap sebagai 'inferiority complex'," kata beliau pada program Bicara Minda Survival Ekonomi Melayu anjuran *Sinar Harian* di sini, hari ini.

Menurut Musa, sikap terlalu merendah diri dan kebergantungan terus kepada kerajaan bagi mendapatkan sesuatu lesen atau tender perniagaan harus dilupakan dari minda masyarakat Melayu.

"Pada hemat saya, kalau tiap-tiap kali kita katakan, kita ini Melayu, kerajaan mesti tolong, kalau kerajaan tak tolong, kita tak boleh buat, ini harus kita kikis dalam mentaliti kita," tegas Musa.

Tegasnya, hanya dengan mengubah mentaliti ini sahajalah orang Melayu akan terus maju ke hadapan walaupun tidak menafikan ramai di kalangan anak-anak Melayu pada hari ini sudah berjaya dan keluar daripada kepompong itu.

"Psikologi sangat penting, mentaliti sangat penting untuk sesiapa mencapai kejayaan. Kalau pemikiran kita, sikap yang pasif, menerima segala-galanya dan membuat sesuatu atas kehendak orang lain, ataupun membuat sesuatu bergantung kepada orang lain, kita tidak akan mendapat kejayaan," ujar Musa lagi.

Beliau yang menerajui konglomerat Sime Darby Berhad berkata, orang Melayu mesti yakin dengan kemampuan mereka dan mendapatkan sesuatu projek misalnya atas kelayakan mereka, bukan atas bantuan kerana Melayu.

"Tidak ada jalan senang dalam bidang ekonomi atau perusahaan dan bisnes," katanya yang menekankan orang Melayu mesti menolak sikap perkauman dalam memajukan ekonomi bangsa.

"Sudah tiba masanya di mana orang Melayu perlu sedar untuk berjaya ia tidak harus mengira sama ada ia hendak menjual atau berusaha sesuatu itu dengan orang Melayu sahaj, tidak boleh," jelas beliau.

©2012 | Hakcipta Terpelihara Grup Digital Karangkrif

Source: <http://www.sinarharian.com.my/nasional/jangan-terlalu-gantung-pada-kerajaan-nasihat-musa-hitam-1.139011>